



Takornariartitsinermik ingerlatsivinnut takornarialerinermik ingerlataqarnissamut akuersissutit pillugit ilitsersuut

Siunertarineqartoq

Ulloq 1. januar 2025 Takornariartitsinermik ingerlataqarneq aamma inuussutissarsiutigalugu ingerlatsinermi zonenut immikkoortiterineq il.il. pillugit Inatsisartut inatsisaat (takornariartitsinermik ingerlataqarneq pillugu inatsit)¹ Kalaallit Nunaata inatsisigilerpaa. Takornariartitsinermik ingerlataqarneq pillugu inatsisip Kalaallit Nunaanni takornariartitsineq siuarsassavaa, tamatumalu peqatigisaanik takornariartitsinermik ingerlatsineq ilaatigut isumannaatsuunissaq, peqqissuseq, avatangiisit aamma piujuartitsineq eqqarsaatigalugit pissalluni, aamma takornarialerisut Kalaallit Nunaata ineriartortinneqarneranut tapersiissallutik.

Takornariartitsinermik ingerlataqarnissamut akuersisummik qinnuteqarnermut atatillugu inatsisip imarisaani tangertat pingaarutillit allaaserineqarnissaat, aamma inatsimmi akuersissutit pillugit piumasaqaatit ataatsimut nassuiarneqarnissaat, takornariartitsinermik ingerlataqarneq pillugu inatsimmut ilitsersuutip siunertaraa. Takornariartitsinermik ingerlataqarneq pillugu inatsimmi oqaatsit imarisaasa isumaat pillugit nalunaarsuut ilitsersuutip matuma naggataani nassaaressinnaavat.

Qaagukkut akuersisummik peqassavit?

Takornariartitsinermik ingerlataqarneq inunnit ingerlatseqatigiiffinnillu akuersisummik peqartunit taamaallaat ingerlanneqarsinnaasoq. Takornariartitsinermik ingerlataqarneq pillugu inatsimmi piumasaqaataavoq². Takornarianut ulloq naallugu angallassinernik unnuinertaqanngitsunik aamma angallassinernik ullunik arlalinnik sivilissusilinnik³ neqeroorteqarnissat kissaatigigukku, takornariartitsinermik ingerlataqarneq pineqassaaq.

Inatsisip ulloq 1. januar 2025 atuutilinnginnerani takornariartitsinermik ingerlatereersimaguit, akuersisummik peqarnissamik piumasaqaat aatsaat 1. januar 2027-imi atuutilissaaq.⁴ Eqqaamajuk piffissaqarlualutit qinnuteqassagavit.

Takornariartitsinermik ingerlataqarneq nutaaq akuersissuteqarnani aallartinneqarsinnaanngilaq. Taamaammat takornariartitsinermik ingerlataqarneq aallartitsitsinnagu akuersisummik qinnuteqassaatit pissarsillutillu.

Taamaattoq ilanngussinnginnerit arlaqartut atuupput:

¹ Inatsit nr. 62, 25. november 2024-imeersoq.

² Takornariartitsinermik inatsimmi § 3, imm. 1.

³ Takornariartitsinermik inatsimmi § 2, imm. 1.

⁴ Takornariartitsinermik inatsimmi § 18.



1. Illit takornariartitsinermik ataatsimik imaluunniit arlalinnik ingerlataqartut takornarialerisutut ataatsimut kaaviiartitavit ukiumoortumik 50.000 kr.-it qaangingippagit, akuersisummik pissanngilatit.⁵

2. Sumiiffinni nunami aalajangersimasuni takornariartitsinermut akuersissuteqarnissaq pillugu Inatsisartut inatsisaat malillugu pisinnaatitsisummik peqaruit, akuersisummik pissanngilatit.⁶

3. Tassunga atatillugu takornarianut ulloq naallugu angallassinernik imaluunniit angallassinernik ullunik arlalinnik sivisussuseqartunik neqerooruteqarnak, Kalaallit Nunaannut imaluunniit Kalaallit Nunaannit inunnik angallassinernik suliaqaruit, akuersisummik pissanngilatit.⁷ Ilaatigut umiarsuit takornariartaatit aamma umiarsuit allat, inunnik Kalaallit Nunaannut imaluunniit Kalaallit Nunaannit angallassisut, aamma Kalaallit Nunaani timmisartoqarfiup hotelillu akornanni biiliussisut uani pineqarput.

4. Akuersissut pillugu piumasaqaammit assigiimmik suliaqarfiit ilanngutitinneqannginnissaat Naalakkersuisut qinersinnaavaat⁸. Taamaaliorinnaatitaaneq massakkuugallartoq atorneqanngilaq.

Ilanngutsitsinnginnernut ilaatitaanngikkuit, akuersisummik peqarnissamik piumasaqaammit immikkut akuersissuteqarfigineqarnissamik qinnuteqarsinnaavutit. Qaqutigorluinnaq immikkut akuersissuteqarneq taamaallaat tunniunneqartarpoq. Tamanna pillugu erseqqinnerusumik qupperneq 5 takuuk.

Qanoq ilillutit akuersisummik pisinnaavit?

Akuersisummik pissaguit, piumasaqaatit pingasut naammassisimasussaavutit.

Tulliuttut naammassisimassavatit:

1. Inuttut imaluunniit ingerlateqatigiiffittut Kalaallit Nunaannut atassuteqarneq pisariaqartinneqartoq pigissavat,
2. Isumannaallisaanermut pilersaarut suliarissavat aamma
3. inuussutissarsiutilittut akisussaanermut sillimasiisimassaatit imaluunniit allatut qularnaveeqqusiisimassallutit.

Akuersissutit tamakkiisumik atuuffiani, piumasaqaatit naammassineqarsimassapput.⁹

Piumasaqaatit ataasiakkaarlugit tulliuttuni itisilernerqarput.

⁵ Takornariartitsinermik inatsimmi § 3, imm. 6.

⁶ Takornariartitsinermik inatsimmi § 1, imm. 3.

⁷ Takornariartitsinermik inatsimmi § 1, imm. 4.

⁸ Takornariartitsinermik inatsimmi § 1, imm. 5.

⁹ Takornariartitsinermik inatsimmi § 3, imm. 2-mi oqaaseqatigiit siulliit.



1. Qinnuteqartup Kalaallit Nunaannut atassuteqarnera

Akuersissummik kissaateqaruit, inuttut imaluunniit ingerlatseqatigiiffittut qinnuteqassaatit.

Inuk Kalaallit Nunaanni inunnik nalunaarsuisarfimmi allaqqasimappat, Kalaallit Nunaanni akileraartussaataappat aamma nammineersinnaatitaappat, akiliisinnajunnaarsimanngippat, akiliisinnaanngitsutut- imaluunniit atorunnaarsitsinissamik suliaqarfigineqanngippat, taamaallaat akuersissummik nalunaaruteqarfigineqarsinnaavoq.¹⁰

Ingerlatseqatigiiffik, tassani piginnittoq/piginnittut ingerlatseqatigiiffimmut aningaasaliissutiminnik aningaasatigut atasunut aalajangersimasunut taamaallaat inatsisitigut pisussaataallutik imaluunniit akisussaataallutik, imaluunniit ingerlatseqatigiiffimmi ingerlatseqataasoq minnerpaamik ataaseq inuttut ingerlatseqatigiiffimmut pisussaaffeqarluni akisussaaffeqarluniluunniit, aamma ingerlatseqatigiiffik akiliisinnajunnaarsimanngippat, akiliisinnaanngitsutut- imaluunniit atorunnaarsitsinissamik suliaqarfigineqanngippat, ingerlatseqatigiiffik taamaallaat akuersissummik nalunaaruteqarfigineqarsinnaavoq.¹¹

Ingerlatseqatigiiffik, tassani piginnittoq/piginnittut suliffeqarfimmut aningaasaliissutiminnik aningaasatigut atasunut aalajangersimasunut taamaallaat inatsisitigut pisussaataallutik imaluunniit akisussaataallutik, pineqarpat, ingerlatseqatigiiffiup aningaasaataasa 2/3-ii toqqaannartumik imaluunniit toqqaannanngitsumik inunnit Kalaallit Nunaanni inunnik nalunaarsuisarfimmi allassimasoqartunit pigineqassapput, Kalaallit Nunaannut akileraartussaataallutik aamma akiliisinnajunnaarsimassanngillat, akiliisinnaanngitsutut- imaluunniit atorunnaarsitsinissamik suliaqarfigineqassanatik. Aamma taasisinnaatitaanerit 2/3-ii toqqaannartumik toqqaannanngitsumilluunniit inunnit, piumasaqaatinik taakkua assinginik naammassinnittunit pigineqassapput.¹²

Ingerlatseqatigiiffik, tassani piginnittut suliffeqarfimmut aningaasaliissutiminnik aningaasatigut atasunut aalajangersimasunut taamaallaat inatsisitigut pisussaataallutik imaluunniit akisussaataallutik, pineqarpat, peqataasut 2/3-ii Kalaallit Nunaanni inunnik nalunaarsuisarfimmi adresseqassapput, Kalaallit Nunaannut akileraartussaataallutik aamma nammineersinnaatitaassallutik, akiliisinnajunnaarsimassanatik, akiliisinnaanngitsutut- imaluunniit atorunnaarsitsinissamik suliaqarfigineqassanatik.¹³

2. Isumannaallisaanermut pilersaarut

Akuersissummik kissaateqaruit, suliniummut tuniniassallugu kissaatigisannut atasumik inatsisini allani isumannaallisaanermut immikkut ittumik piumasaqaateqartoqanngippat,

¹⁰ Takornariartitsinermik inatsimmi § 7.

¹¹ Takornariartitsinermik inatsimmi § 8, nr. 1 aamma 2.

¹² Takornariartitsinermik inatsimmi § 8, nr. 3 aamma 4.

¹³ Takornariartitsinermik inatsimmi § 8, nr. 5.



ulloq naallugu angallassinernut taakkununga, takornarianut neqeroorutigiumasaannut, allakkatigut isumannaallisaanermut pilersaarut immersorsimassavat.¹⁴

Inatsisini allani immikkut ittunik piumasaqaateqanngippat, akuersissut pillugu qinnuteqaatinnut ilanngullugu isumannaallisaanermut pilersaarut nassiutissavat.¹⁵

Akuersissummik piguit, isumannaallisaanermut pilersaarut takornarianit kalaallisut aamma tuluttut takuneqartussaassaaq, aamma taassuma nutarterneqartarnissaa ingerlaavartumik qulakkiissavat.¹⁶ Assersuutigalugu suliniutitit sussutsimikkut allanngorpata taamaalilluni, navianaatit nutaat ilaalerlutik, imaluunniit pisut piviusut ingerlatseriaatsinnik allanngortitsinissamik pissutissaqalersitsippata, isumannaallisaanermut pilersaarutivit nutarterneqarnissaa naleqquttuusinnaavoq.

Isumannaallisaanermut pilersaarut marlunnik imaqarpoq: Ajutoorutaasinnaasunik nalilersuineq aamma upalungaarsimanissamut pilersaarut.¹⁷

Ajutoorutaasinnaasunik nalilersuineq

Isumannaallisaanermut pilersaarummi ajutoorutaasinnaasunik nalilersuineq takornarianut angusassamik toraagaqassaaq aamma suliniutini ajutoorutaasinnaasut pillugit naliliinerit allaaserineqarnerinik imaqaassalluni. Oqaatsit erseqqissut aamma paasiuminartut atorlugit allassimassaaq, taamaalilluni suut ajutoorutaasinnaanersut takornariat paasiniassammassuk. Ajutoorutaasinnaasunik naliliineq, sulisut, piffissami angalaarfiusussami angalanermi aqutsisup toqqarneqarneranut, pissutsit nalilerneqarnerannut, atortussat toqqarneqarnerannut imaluunniit takornarianut suliniummut kissaatigineqartumut tunngavilersuutit allat, ajutoorutaasinnaasunik nalilersuinermit tunngaviujumaarpoq.¹⁸

Upalungaarsimanissamut pilersaarut

Upalungaarsimanissamut pilersaarut ajutoorutaasinnaasunik nalilersuinermit tunngaveqassaaq aamma, illit sulisuillu ajutoornernik navianartorsiornernillu pisoqarpat, qanoq iliornissassinik eqqarsaateqarnersusi pillugit allaaserinninnermik imaqaassalluni. Sulisut ilisimasassaannut, misilittagassaannut aamma pikkorissuseqarfissaannut piumasaqaatit upalungaarsimanissamut pilersaarummi aamma allaaserineqassapput. Assersuutigalugu sulisutit immikkut ittunik isumannaallisaanermut atortunik imaluunniit ikiueqqaarnermik misilittagaqartut. Illit sulisuillu upalungaarsimanissamut pilersaarut ilisimassavarsi, aamma ajornartoornermi qanoq iliuuseqassalluni nalussanngilasi.¹⁹

¹⁴ Takornariartitsinermik inatsimmi § 9, imm. 1 aamma 6.

¹⁵ Takornariartitsinermik inatsimmi § 9, imm. 1.

¹⁶ Takornariartitsinermik inatsimmi § 9, imm. 2 aamma 3.

¹⁷ Takornariartitsinermik inatsimmi § 9, imm. 3.

¹⁸ Takornariartitsinermik inatsimmi § 9, imm. 4.

¹⁹ Takornariartitsinermik inatsimmi § 9, imm. 5.



3. Sillimmasiineq imaluunniit allatut qularnaveeqqusiineq

Akuersissummik kissaateqaruit, inuussutissarsiutilittut akisussaanermut sillimmasiissummik imaluunniit allatut qularnaveeqqusiissummik takornariartitsinermik ingerlatsivik sillimmasersimassaaq.²⁰ Allatut qularnaveeqqusiineq assersuutigalugu kontomik toqqorsivimmik aningaasartalimmik imaluunniit qallunaat statsobligationiiniq imaluunniit aningaaseriviup qularnaveeqqusiineranik tunniussinertut iluseqarsinnaavoq.

Takornariat allallu ajunaarutigisamik taarsiissussatut akisussaausumit suliniutinut, akuersissummi ilaasunut atatillugu akisussaaffigineqalersinnaasut, taarserneqarsinnaanerat qularutiginninnginnissaata qulakkeerneqarnissaa, sillimmasiissuteqarnissamut/qularnaveeqqusiinissamut siunertaavoq.

Sillimmasiissutip/qularnaveeqqusiissutip matussusigassai pillugit aningaasat amerlassusaasa qanoq amerlatiginissaat minnerpaaffilerneqanngilaq. Navianartorsiorfusinnaasut, suliffeqarfimmut atassuteqartut, annertussusaat qanoq issusaallu, tassunga apeqqutaapput. Taamaattoq aningaasat amerlassusaasa qaffanneqarnissaa, imaluunniit sillimmasiinermut/qularnaveeqqusiinermut piumasaqaatit allanngortinneqarnissaa akuersissummik tunniussinissaminut Naalakkersuisut piumasaqaatigisinnaavaat.

Takornariaqartitsinermik ingerlatsivimmut suussutsimut pineqartumut suleriaaseq malillugu tamanna periarfissaanngippat, inuussutissarsiutilittut akisussaanermut sillimmasiissummit imaluunniit qularnaveeqqusiissummit allamit matussuserneqarsimanissat piumasaqaataanngilaq.²¹ Tamanna taamaattoq uppersarsassavat, assersuutigalugu sillimmasiisarfinnit/aningaaserivinnit arlalinnit itigartissutit ilanngunnerisigut.

Immikkut akuersissuteqarneq

Akuersissummik pinissamut piumasaqaatit naammassinngikkukkit, immikkut akuersissuteqarnissap qinnuteqaatiginissaa periarfissaavoq. Immikkut akuersissuteqarnissaq pillugu qinnuteqarnissat kissaatigigukku, akuersissummik qinnuteqaatinni tamanna taassavat. Immikkut akuersissutit taamaallaat pisuni immikkut ittuni aamma piffissamut killilimmut piffissami ukiunut 2-nnut (taamaattoq qinnuteqarnerup kingorna sivitsorneqarsinnaasumik) nalunaarutigineqartarmata sianigigiuk.²²

Immikkut akuersissuteqarnissaq kissaatigigukku, immikkut akuersissuteqarnissamut piumasaqaatit suut immikkut akuersissuteqarnermi kissaatigineritit taassavat. Kissaatigisat erseqqissorujussuarmik paasinarluartumillu tunngavilersunngikkukku, immikkut akuersissuteqarfigineqarnissat naatsorsuutigissanngilat. Piumasaqaatinit tamanit immikkut akuersissuteqarnissap nalunaarutigineqarnissaa naatsorsuutigineqarsinnaanngilaq.

²⁰ Takornariartitsinermik inatsimmi § 10, imm. 1.

²¹ Takornariartitsinermik inatsimmi § 10, imm. 2.

²² Takornariartitsinermik inatsimmi § 11.



Immikkut akuersissuteqarnerup nalunaarutigineqarnissanut pisut suulluunniit
eqqarsaatigineqarsinnaasut allaaserissallugit periarfissaanngilaq, kisianni assersuutit
tulliuttut ukuusinnaapput:

1. Suliniutitut attuumassuteqartunik navianaatinik piviusunik peqanngippat,
isumannaallisaanermut pilersaarummut imaluunniit sillimmasiinissamut/
qularnaveeqqusiinissamut piumasaqaammit immikkut
akuersissuteqarfigineqarsinnaavutit.
2. Illit imaluunniit suliffeqarfimmi piginnittut allat ilinniarneq imaluunniit
napparsimaneq pissutigalugu nunami allami najugaqarallartariaqaruit, Kalaallit
Nunaanni inunnik nalunaarsuisarfimmi adresseqarnissaat aamma Kalaallit
Nunaannut akileraartussaataitaanermut piumasaqaatinit (utaqqiisaagallartumik)
immikkut akuersissuteqarfigineqarsinnaavutit.
3. Assersuutigalugu kingornussinermut atatillugu suliffeqarfiutit
tunniunneqassappat, aamma attaveqarnissaq pillugu piumasaqaatit
naammassineqarsinnaanngippata.